

NAQQIUT

Taarserpaa akissuteqaat 29. april 2026-meersoq

Nunatta kangianut tulluarsakkamik ilinniarfimmik, Tasiilami inissinneqartussamik pilersitsinissaq pillugu Naalakkersuisut siunnersuusiornissamik peqquneqarnissaannik Inatsisartut aalajangiiffigisassaattut siunnersuut. Ilinniarfik assigiinngisitaartumik ilinniarfiullunilu piginnaasaqalerfiunissaa tunngavigineqassaaq. Siunnersuut UPA2027-mi saqqummiunneqassaaq.

(Inatsisartunut ilaasortaq Nivi Rosing, Inuit Ataqatigiit)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Inatsisartuni ilaasortaq Nivi Rosing Inuit Ataqatigiit, siunnersuuteqarneranut Naalakkersuisut sinnerlugit qujaffigaara.

Siunnersuutigineqartoq Tasiilami ilinniarfimmik pilersitsinissamik siunertaqarpoq najukkamilu pissutsinik, pisariaqartitanik piginnaasanillu aallaaveqarluni ilinniarnissamik neqerooruteqartalernissamut ineriartortitsinissaq siunertarinqarluni. Tasiilami Tunumilu ilinniarnissamik periarfissat annertusarneqarlutillu periarfissaalernissaanik kissaateqartoqarnera Naalakkersuisunit eqqumaffigineqarpoq.

Tasiilami ilinnarfiusinnaasunik misissuisoqarnissaanik siunnersuutit Naalakkersuisut isumaqatigaat, ilutigalugulu pilersitsinissannaanissamut tunngatillugu aalajangivittoqartinnagu pisariaqartitsinerup tamakkiisumik qulaajaqqissaarnissaa kissaatigalugu, misissuinerullu inerneru UKA2027-mi saqqummiunneqarsinnaanissaat naatsorsuutigineqarluni.

Pisariaqartitsisoqarneranik tamakkiisumik misissueqqissaarnikkut siunissami suliniutissat paasissutissanik eqqortunik tunngaveqarluni Tasiilamilu ilinniartitaanerit sammivissaat, pikkorissartarnissanut pisariaqartitsinerit, sullinniakkat siunniussat aqqissugaanissaalu eqqarsaatigalugit pisariaqartitat aallaavigalugit qulakkeerneqarsinnaapput. Ilinniarfissamik ingerlariaqqiffiusinnaasussamik suliffeqarfimmilluunniit siammasinnerusumik ilinniarnissamut pisariaqartitat assigiinngitsut periarfissallu ataatsimoortillugit paasinarneqarnissaat pissusissamisuussasoq Naalakkersuisut suliamut atatillugu isumaqarput.

Tassunga atatillugu siammasinnerusumik tamakkiinnerusumillu ilinniarnissamut pisariaqartitat, taakkualu ilusissai periarfissaalu, kiisalu ineriartornissamut periarfissat assigiinngitsut ataatsimut isigineqarnissai pissusissamisuussasoq Naalakkersuisut isumaqarput, taamaalilluni immikkut ilinniarfissap ataatsip pilersinneqarnissaanik misissuinerinnaanani.

Pisariaqartitsinerup misissoqqissaarnerani aalajangiiffigisassatut siunnersuutit aallaavigineqassapput, taamaattorli Tasiilami tamakkiisumik siunissarlu ungasinnerusoq isigalugu pisariaqartitat aallaavigalugit aalajangiiffigisassatut siunnersuusiortoqassalluni.

Pisariaqartitsinerup misissoqqissaarnerani makku ilaatigut ersersinniarneqassapput:

- Tasiilami massakkut siunissamilu ilinniagassatut neqeroorutigineqartartut

- Ilinniakkanik assigiinngitsunik ilinniartoqarsinnaanissamullu periarfissat pisariaqartitsinerlu
- Ilinniakkat assigiinngitsut naleqquttut qaffasissusissaallu, tassani eqqarsaataallutik inuussutissarsiutinut ingerlaqqiffiusumilu ilinniarnissamut periarfissat
- najukkami ilinniartitsinissamik periarfissaasut saniatigut ungasianiit ilinniartitsinnaanerit qarasaasi allu atorlugit aaqqiissuteqarsinnaanerit misissornissaat
- periarfissat assigiinngitsut eqqarsaatigalugit aningaasatigut allaffissornikkullu sunniutissat
- ilinniarfioreersunik suleqateqarsinnaanissamut periarfissat

Misissueqqissaarnerup tamakkiisup siunissami suliniutaasinnaasut piujuartitsisumik ingerlanneqarnissaat kiisalu najukkami ataasiakkaani naleqqussarnissaanut qulakkeerinnissaaq.

Siunnersuuteqartup siunnersuutigaa Naalakkersuisut UPA2027-mi saqqummiunneqartussamik Tasilaami ilinniarfimmik pilersitsinissamik siunnersuummik saqqummiussissasut. Pilersitsinissamut siunnersuusiortoqartinnagu Naalakkersuisut sukumiisumik aalajangernissamut tunngavissaqartariaqarput.

Taamaattumik Naalakkersuisut ima allannguutissatut siunnersuummik saqqummiipput: ”Tasiilami ilinniarfimmik pilersitsinnaanissamut pisariaqartitsineq pillugu nalunaarusiamik UPA2027-mi saqqummiunneqartussamik Naalakkersuisut suliaqarnissamut Inatsisartut aalajangiiffigisassaattut siunnersuut”.